

**Protocol no. 40****Sezzüda da lündeschdi, 23 november 2009, 20.00 - 22.50**

**Preschaints:** Jon Carl Rauch; Chasper Alexander Felix, Georg Salomon, Marianne Werro-Lehmann, Jachen Andri Schmidt e Rico Zini (protocol)

**Protocol**

Il protocol no. 39 da la sezzüda dals 17 november 2009 vain approvà.

**345 790** **PLANISAZIUN DAL TERRITORI**  
**Zona da mansteranza Parnarsura**

Davo avair tut incunter l'intent da duos mansterans da vulair eriger lur gestiuns illa zona da mansteranza a Parnarsura, decida il Cussagl cumünal da nu tour pel mumaint sco previs our da la zona da mansteranza quel cuntegn e da laschar la zona sco ch'ella as preschainta hoz. Ils interessents han da preschaintar lur concept a regard la grondezza bsögnada ed eir la fuorma previsa dals stabilimaints. Davopro as poja trattar la chosa a man da las infuormaziuns.

**346 012** **EXECUTIVA**  
**Plan directiv**

Il Cussagl cumünal integrescha las correcturas e las aggiuntas fattas dals cusgliers insembel cun lur cumischiums. Causa il temp avanzà segua la segunda lectüra illa prosma sezzüda dal Cussagl cumünal.

**347 020** **ADMINISTRAZIUN CUMÜNALA**  
**Reglas Mas-chalch**

Illa radunanza cumünala dals 29 settember 2009 d'eira gnü remarchà ch'aint il Mas-chalch saja stat publichà ün massa grond inserat d'üna persuna privata. I da adüna darcheu glied privata chi publichescha, cunter pajamaint, infuormaziuns o inserats. Per far quai faja da bsögn da reglas impegnativas. Il Cussagl cumünal decida dad introdüer pel Mas-chalch las seguaintas reglas:

**Lingua dal Mas-chalch**

I vegnan tut incunter be texts da lingua rumantscha. Text dubels in rumantsch ed in tudais-ch sun admiss.

**Grondezza dals inserats per persunas privatas**

La grondezza da l'inserat das-cha importar il plü bler üna mezza pagina A4.

**Cuosts per persunas privatas**

Fin 1/4 pagina sco fin uossa                   fr. 30.--  
1/4 fin 1/2 pagina                               fr. 60.--

348 740

## **SUNTERI E SEPULTÜRAS**

### **Reglamaint da sepultūra e da sunteri**

Il Cussagl cumünal piglia incunter l'infuormaziun da la schefa da sanità a regard ils artichels 15 – 16 dal reglamaint da sepultūra e da sunteri. Quels artichels defineschan il pos da las fossas e quel da las urnas. Aint il reglamaint d'hoz exista eir per las urnas ün pos d'almain 25 ons. Quai chi nun es però mai gnü praticà. Per adattar il reglamaint a la pracha, decida il Cussagl cumünal da müdar ils artichels in quel sen cha per urnas nun exista ingün temp da pos obligatoric. Ellas han però il dret da restar in sunteri il listess temp sco las fossas cun vaschels. Quist müdamaint gnarà preschantà a la populaziun.

349 620.311

## **Signalisaziun da vias e piazzas**

### **Plazza da parcar Avant Baselgia**

Il Cussagl cumünal vaiva decis d'eriger üna plazza da parcar davant la chasa da sar Conti Puorger. Üna part gniss sün seis terrain privat e premissa es cha pel temp ch'el es a Sent, stetta la plazza a sia disposiziun. Cun charta dumonda el scha eir seis confamigliars survegnan, d'ürant lur vacanzas, üna cartina per parcar in quel lö. Il Cussagl cumünal decida da na pudair gnir incunter a quista dumonda.

350 830.365.01

## **Bus da skis**

### **Pendicularas Motta Naluns**

Il capo orientescha ch'illa sezzüda dal Cussagl administrativ da la PMNSA saja gnü remarchà cha l'organisaziun da transportar davent ils skiunzs culs bus da skis aint in Plaz nu saja suffizianta avuonda. Üna pussibilità füss da far üna tscherta via cun giatters ingio cha'ls skiunzs ston ir tras per ir aint ils bus da skis. Il Cussagl cumünal nu vezza quella pussibilità sco realistica. La plazza es publica e d'inviern bain frequentada e per la rumida da naiv es quista masüra na acceptabla. L'idea da montar cameras chi emettan a la Posta quantas persunas chi han da gnir transportadas gio Scuol füss üna megltra varianta. Cun quai pudess la Posta reglar plü bain il transport da la gliעד. Els han fingià signalisà ch'els füssan pronts da stübgjar quella chosa. Il capo piglia incunter la proposta e tratta in quel sen culla Posta.

L'actuar: